

# Ī..a

*Lah-jih*

Ī..a chit-ê miâ-sû, m̄-sī beh hō góa kiò..ê, sī kan-ta beh hō góa chheng-hō, hō góa siâu-liām..ê, in-ūi tī góa kī-tī lâi-té, chiông-lâi tiòh m̄-bat tng-bīn kiò i l sia<sup>n</sup> " Ī..a", in-ūi Ī..a ūn-khì báí, put-hēng gòeh-lāi-hong sòa lâi kòe-sin, mā chhōa cháu tâ<sup>n</sup>(pian-chip: ta<sup>n</sup> chia<sup>h</sup>) chhut-sì bô gōa-kú ê sió-mōai, pàng-sak góa chit-ê pháí<sup>n</sup>-miā ê ban-á-kiá<sup>n</sup>. Hit-nī góa 5 hòe, to iáu-bōe 4 chiok-hòe--leh, thia<sup>n</sup> kóng Ī..a mā chia<sup>h</sup> 40 thóng hòe niâ(pian-chip: nā-tiā<sup>n</sup>).

Ūi-tiòh beh kā Ī..a ê hàn-chháu, bīn-bô khng-tiàm kī-tī lâi-té, thang hó sī-sī siâu-liām, tiòh khai-sí sì-kè péng toh-kūi-á, hian chhù-lāi ê hō-kháu-miā-phō, sin-hūn-chèng, A-hia<sup>n</sup> thak--kòe ê chheh, sui-jiân bô gōa-chē mih thang péng, iū-gōan chhiau kúí nā piàn, lóng chhōe bô Ī..a ê siông-phì<sup>n</sup>, mā bô Ī..a ê kè-chng, á-sī hoe-hún hit-lūi ê cha-bó-lâng mih-kiā<sup>n</sup>.

Bô siông thang khòa<sup>n</sup>, iōng m̄ng..ê. M̄ng A-pa, m̄ng A-hia<sup>n</sup>, m̄ng A-peh, A-ám, m̄ng chhù-pi<sup>n</sup> keh-piah, tit-tiòh ê kiát-lūn sī: se<sup>n</sup>-chò lò-lò, hàn-chháu bē báí, kha-chhiú liú-liáh, hó chò-hóe, ài pang-chān--lâng...

Sēng chiá? Che sī góa siōng beh chai-ia<sup>n</sup>..ê. "Sēng jī-hia<sup>n</sup>, lāng lò-lò". "Sēng lín jī-ché--lah, bīn-á í<sup>n</sup>-í<sup>n</sup>". "Kah-ná sēng Lín A-kū, bák-chiu chhim-o chhim-o". "Siōng kài sēng lín kè hái-kháu hit-ê A-í".

A-í leh? A-í--leh? "Sí lâu-bú, lō-thâu tng", hng tī hái-kháu, iā m̄-bat lâi-khì. Thâu-khak lâi iū-gōan bô hēng-ia<sup>n</sup>. Kī-tī ê chhng-khò, Ī..a ê hit-keh ūi-ti, iū-gōan sī khang-péh, bāng-tiong ê bó-chhin, sī bōng-bōng chit-piàn, chí ū lēng-hún tòe sin-pi<sup>n</sup>.

Ī..a pháí<sup>n</sup>-miā, sè-hàn tiòh hō A-má phō lâi io, phiau-chún ê sin-pū-á miā, sui-jiân bô-lāng gék-thāi..i, chóng--sī bô-thang hióng-siū chò lāng cha-bó-kiá<sup>n</sup> ê chū-iū, lāng kóng "kam-gōan chò sán-hiong-lāng ê cha-bó-kiá<sup>n</sup>, m̄ chò hó-giáh-lāng sin-pū", hô-hóng lán Siau--ka kāng-khóan sī sán-phí-phí ê chng-kha-lāng.

Ī..a tī-sī kap A-pa kat-pāng sak-chò-tui, góa m̄ chai-ia<sup>n</sup>. 40 thóng hòe ê jīn-seng, se<sup>n</sup> 6 ê hāu-se<sup>n</sup>, 3 ê cha-bó kiá<sup>n</sup>, phah-sng 2 ê, chhun ê 5 ê hāu-se<sup>n</sup>, 2 ê cha-bó-kiá<sup>n</sup> lóng ū hó ke-kah, kiàn-lip bí-móa ka-tēng, sui-jiân m̄ sī tōa-hù tōa-kui, chóng--sī láu-sit phah-pià<sup>n</sup> kòe-jit, m̄-bat chò pháí<sup>n</sup> tãi-chì, sng sī ū hó ūi-thōan, bô pāi-hāi tiòh pē-bó ê miâ-sia<sup>n</sup>. Ī..a ê it-seng, sit-chāi bô óng-hùi i lâi sè-kan kiá<sup>n</sup> chit-chōa.

Ī..a! Lí tī tó-ūi? Kiám bē su-liām Lí ê ban-á-kiá<sup>n</sup>, i í-keng 60 hòe, jít-jít siū<sup>n</sup> beh kap Lí siōng-hōe, òng-bāng Ī..a Lí lâi thok-bāng, iáh-sī tán-thāi Lí ê ban-á-kiá<sup>n</sup>, sè-kan chek-jīm ôan-móa, chia<sup>h</sup> lâi sio-chhōe.